

HILLSONG CHURCH SOUTH AFRICA

**MOLAETSA
O MOLEMO**

MATSATSING A LATELANG A 21

[HILLSONG.COM/SOUTHAFRICA](https://www.hillsong.com/southafrica)

RE U AMOHELA HAE

Re u batla ho u amohela ka mokhoa o moholo!

Re thabetse hore u bile le rona. Re ts'epa hore u ile oa natefelo, mme oa iphumana u le lapeng.

Re lumela hore motho e mong le e mong o bohlokoa ho Molimo, le hore Molimo O na le merero le sepheo e metle ka oena.

Re le kereke, re lokisitse thuto ena ya tataiso ya matsatsi a mashome a mabeli a motso o mong ho u thusa leetong la hao le Jesu.

Ka lerato lohle
Phil le Lucinda
Baruti ba sehloho
Kereke ya Hillsong Afrika Borwa

RE DUMELA ENG?

RE DUMELA hore Bebele ke Lentswe la Modimo. E nepahetse, ke nnete ebile e sebetsa maphelong a rona letsatsi ka letsatsi.

RE DUMELA ho Modimo a le mong wa mehla yohle eo e leng Mmopi wa tsohle. O phela ka boraro bo bong; Modimo Ntate, Modimo Mora le Modimo Moya O halalelang. O tletse ka lerato le khalalelo.

RE DUMELA hore sebe se re arohantse le Modimo le sepheo sa maphelo a rona.

RE DUMELA hore Morena Jesu Krete e le Molimo le motho ke Yena feela ya ka re boelanyang le Modimo. O phetse bophelo ba mohlala o kgethehileng bo senang sebe, a re shwela sefapanong, mme a tsoha bafung ho paka tlhoho ya Hae le ho re fa bophelo bo sa feleng.

RE DUMELA ho fumana tshwarelo le tswalo e ncha re tlameha ho bakela dibe tsa rona, re dumele ho Jesu Krete e le Morena, mme re inehele ho thato ya Hae maphelong a rona.

RE DUMELA ho phela maphelo a kgalalelo a atileng ao Modimo A re reretseng ona, re hloka ho kolobetswa ka metsi le ho tlala ka matla a Moya O Halalelang. Moya O Halalelang O re atlehisa ho sebedisa dineo tsa Moya, ho kenyeletswa le ho bua ka maleme.

RE DUMELA matleng le bohlokwa ba Kereke hammoho le tlhokeho ya balumedi ho ba hammoho khafetsa bakeng sa kopano ya boena, thapelo le 'ho ngwathweng ha bohobe'.

RE DUMELA hore Modimo O re hlomelletse ka bomong hore re tle re atlehe ho fihlela sepheo sa Hae ka maphelo a rona e leng ho kgumamela Modimo, ho phetha karolo ya rona kahare ho Kereke le ho sebeletsa setjhaba seo re phelang ho sona.

RE DUMELA Modimo O batla ho re fodisa le ho re fetola hore re tle re phele bophelo bo hlhonolofetseng molemong wa ho thusa ba bang ka mokhwa o phethehileng.

RE DUMELA hore qetello ya rona ya ka ho sa feleng ya ho ya Lehodimong kapa diheleng e khethwa ke karabelo ya rona ho Morena Jesu Krete.

RE DUMELA hore Morena Jesu Krete Wa khutla jwalokaha a tshepitsitse.

JESU WA U RATA

Rea u lebohela ka ho etsa qeto ya ho latela Jesu. Re dumela hore leeto la ho hola tsebong ya Jesu le etseha hantle haholo kopanong ya badumedi. Ka ha u tlameha u na le dipotso, re lokisitse bukana ya tataiso ya matsatsi a mashome a mabedi a motso o mong ho u thusa ho hola dikamanong tsa hao le Jesu, hape le ho u thusa ho iphumana ka hare ho kereke ya rona.

Ke hona e leng qalong...

Ho etswa ba phethehileng, kapa ho pholoswa ke ho inehela ho Modimo le ho inehela ho merero le sepheo sa Hae ka maphelo a rona. Hona ho bolela ho furalla mekhweng ya khale mme u shebe ho Jesu, ho kopa hore a u tshwarele dibe tsa hao le ho amohela bophelo bo bocha ho Yena.

Baroma 10:9 e re "Ha o bolela Morena Jesu ka molomo wa hao, mme o dumela ka pelong ya hao hore Modimo O mo tsositse bafung, o tla pholoswa."

Pholoho ke mpho ya Modimo ya mohau ho rona moo re bang bana ba Hae. Ke kamohelo ya Modimo lelokong la hae e se nang kwenehelo ho tswa ho Modimo le matlafatso a ho phela ka botlalo molemong wa ho bonahatsa Modimo ho dibupuwa tsohle tsa Hae.

Haeba ha u na bonnete ba hore na dikamano tsa hao le Modimo di nepahetse kapa u tseba hantle hore u hloka Jesu bophelong ba hau, u ka khetha ho latela Jesu hona joale ka ho rapela thapelo ya boinehelo ho Jesu.

Jesu, ke rapela thapelo ena hobane ke tseba hore ke entse phoso ka ho phela kante ho Wena. Ke kopa tshwarelo, mme ke tshepa hore U tla ntshwarela. Ke amohela lerato le mohau wa Hao mme ke kopa hore U be Morena wa ka. Nthuse ho dumela ho Wena le ho U rata ka matsatsi wohle, mme U nthuse ho bontsha lefatshe mokhwa wa Hao le boholo ba lerato la Hao. Ka lebitso la Jesu, Amen.

Re u thabetse! Ho rapela mantswe ana ka pelo e inehetseng ho Jesu ke qalo ya leeto la bohlokwa leo u tla le nka, leeto la ho latela Jesu.

Letsatsi:

Lebitso:

LETSATSI LA 1: MODIMO KE MANG?

Kgwedi e potoloha lefatshe, empa lefatshe le potoloha letsatsi. Maphelong a rona, kaofela re ba tekong ea ho fokotsa Modimo ho lekana le kgwedi e potolohang lefatshe. Empa Bibe e bontsha setshwantsho se fapaneng sa Modimo. E re bontsha Modimo ya phatsimang ka khanya ya Hae hoo a bang sehloho maphelong a rona. Ha e be Modimo ya behwang karolong e nyenyane ya bodumedi maphelong a rona. Leha lefatshe la dilemo tsa Bibe le lefatshe la kajeno e le mafatshe a fapaneng, taba e ntle ke hore Modimo eo Bibe e buang ka Yena O ntse a tshwana, ha a so fetohle. Pokello e ka Bibeleng e hlalose semelo sa Modimo e sebetsa e le sesupa-tsela sa nnete se sa fetoheng bakeng sa rona bohle ha re ntse re batlana le ho tseba ka Molimo. Ha re bale ka motho ya ileng a kopana le Modimo boteng ba Hae.

Bebele e rutang eng?

1 Ka selemo seo kgosi Usiya a ileng a shwa ka sona, ka bona Morena a dutse teroneng e phahameng, mophetho wa seaparo sa hae o tletse Tempele. 2 Dirafime di ne di eme kahodimo ho yena, mme serafime ka seng se ne se ena le mapheo a tshelletseng: Ka a mabedi se ikgurumeditse sefahleho, ka a mabedi se ikwahetse maoto, ka a mabedi se fofa.

3 Di ne di howeletsana, di re: "O a halalela! O a halalela! O a halalela Morena wa mabotho, fatshe lohle le tletse tlotla ya hae!" 4 Modimo wa lentswe la se howeletsang wa sisinya ditshiya tsa menyako, mme Tempele ya tlala mosi. 5 Yaba ke re: "A nna elwa! Ke madimabe hakaakang! Ke timetse! Ke motho ya puo di mpe, mme ke phela hara setjhaba se dipuo di mpe. Mahlo a ka a bone Kgosi, Morena wa mabotho." 6 Se seng sa dirafime sa fofela ho nna, ka tsohong la sona se tshwere leshala le hlenneng, leo se le okgileng aletareng ka letlao. 7 Sa ama molomo wa ka ka lona, sa re: "Leshala lena le amme molomo wa hao! Molato wa hao o tlositswe, mme o tshwaretswe sebe sa hao." 8 Yaba ke utlwa lentswe la Morena le re: "Ke tla roma mang? Ke mang ya tla ya bakeng sa rona?" Yaba ke re: "Ke nna enwa! Nthome!" Esaea 6:1-8 (SSO89SO)

Hona ho bolela eng ho nna?

Re ka tseba Modimo A le jwang? Re bona hore: 1) Ke Kgosi e se nang ho fela (V1) Leha marena a lefatshe a ka phela a ba a feta, Modimo o sala a busa teroneng ya Hae. 2) Ke Mookamedi ya hodimodimo (V2). O moholo ka mokhwa o hlolang. 3) Wa halalela (V3) Hona ho bolela hore O hlwekile ka botlalo hape O kgethehile. 4) Ke Morena (V3) Ka puo ya Seheberu, lentswe lena ke 'Shaddai' e leng ho bolela ya matla ho nka kgato molemong wa ba mo rapelang ka tiyo. 5) Ke MMopi (V3). O bopile lefatshe lohle. 6) O tletse khanya le tlotla (V3) Khanya ya Modimo ke ho phatsima ho hlolang hwa semelo sa Hae se phethahetseng. Khanya ya Hae e tlala lefatshe lohle.

Re fana ke karabelo e jwang boteng ba Molimo? Ha re kopana le Modimo ka tiyo boteng ba Hae, re mo kgumamela jwaloka ha manyeloi ana a mo kgumamela (v3), re thothomela ka tshabo, re ipolela dibe tsa rona (v5), re amohela tshwarelo ya Hae le tlhwekiso ya Hae (v7) hape re fumana mekhwa ya ho bolella ba bang ka boholo ba Hae (v8).

Nka etsa eng?

Na u dumela hore Modimo ke Modimo ya hlalositse mo? Haeba bophelo ba hao bo ka bapiswa le lefatshe, Molimo O tshwana le eng haholo ho wena dipakeng tsa kgwedi le letsatsi?

Na u batla ho bala ho ya pele?

Bala Esaea 40:12-27 le Dipesalema 103.

LETSATSI LA BO2: JESU KE MANG?

Dipotso tseo re ratang ho di botsa ka Modimo ha di fele: Na Molimo O teng? Na seo re se tsebang ka Modimo ke nnete? Modimo O amana jwang le bophelo baka?

Bibele e ka nna ya se arabe dipotso tsohle tse amanang le Modimo mme e ka re lebisa ho botsa dipotso tse ding tse ngata, empa moo Bibele e hlakileng, ke moo e fanang ka karabo ho potso ena: Jesu ke mang?

Jesu O babatsa boipolelo ba Moapostola Petrose ba hore ke 'Kreste, Mora wa Molimo ya phelang' (Matheu 16:16), hobane Jesu O ne a tseba hore seo a leng sona - le seo a ka bang sona ho rona - se na le matla a ho fetola maphelo a rona. Jesu O kgethehile hobane mafatshe a mabedi a teana ka ho Yena: Lehodimo le lefatshe, Bomodimo le botho.

Ee, Lebitso la Hae le hlompheha ho feta mabitso wohle, matla a Hae a bopang dinaledi ka phefumoholo ya Hae, a kgutsisang difefo, le a etsang mehlolo, ke matla a sa bapisweng le letho. Ho ntse ho le jwalo, ke Jesu wa nama le madi, Motswalle ya tsebang mathata a rona, ya re tsotellang. Ke ka hona Bibele e Mo bitsang 'Emmanuele', Modimo O na le rona.

Bebele e re ruta eng?

“Modimo O ratile lefatshe hoo a le neileng Mora wa hae ya tswetsweng a inotshi, hore e mong le e mong ya dumelang ho yena, a se ke a timela, a mpe a be le bophelo bo sa feleng.” Johanne 3:16 (SSO89SO)

“v38 Ke kgodisehile hore leha e le lefu kapa bophelo, leha e le mangeloi, leha e le meya e meng e busang kapa e matla, leha e le tse teng kapa tse tlang ho ba teng, v39 leha e le tse hodimo kapa tse tlase, leha e le sebopuwa sefe kapa sefe, di ke ke tsa re arohanya le lerato la Modimo, leo a re bontshitseng lona ka Kreste Jesu, Morena wa rona.” Baroma 8:28-29 (SSO89SO)

Hona ho bolela eng ho nna?

Na Jesu Wa ntsotella? Ee! Wa u tsotella! Re tseba joang? Hangata re ikutlwa re sa tshwanelehe ke lerato la Molimo ka lebaka la nalane ea rona, moo re ileng ra hloleha tseng, le mefokolong ea rona. Sebe se re arohantse le Modimo mme re ke ke ra lefella dibe tsa rona ka ho intlafatsa kapa ka mesebetsi e molemo. Jwale re ka amohela seo re sa se sebeletsang jwang? Bibele e re ha ho letho, sebopuwa sefe kapa sefe, se ka re arohanyang le lerato la Modimo le leng ho Jesu Kreste, Morena Wa rona (Baroma 8:29). Mme ho amohela lerato la Modimo ke ho tshepa mamello, tshwarelo le mohau wa Hae ho rona.

Ke Yena feela ya nang le matla ho re lokolla molatong, dihlong hammoho le tsuong kapa kahlolong e le ho re fa bophelo ka botlalo. Seo re lokelong ho se etsa ke ho fetohela ho Yena.

Nka etsa eng?

Amohela lerato la Hae kajeno. Mo dumelle hore a u rate ka tsela eo u leng ka yona. Wa u rata e bile Wa u thabela.

Na u batla ho bala ho ya pele?

Ho ba le kutlwisiso ya boitsebiso ba hao bo bocha ho Kreste ho fana ka topollo e makatsang. U ka bala haholo ka yona ditimaneng tse latelang: 2 Bakorinthe 5:17; Bafilipi 3:8-11.

LETSATSI LA BO3: MOYA O HALALELANG KE MANG?

Metsi a ka fumaneha ka mefuta e meraro e fapaneng (mokedikedi, mouwane, leqhwa) empa le ha ho le jwalo, a sala e le ntho e le nngwe. Ka tsela e tshwanang, Modimo O iponahatsa ho rona ka boraro: Ntate, Mora le Moya O Halalelang (bala Matheu 28:19). Modimo O mong, ha se medimo e meraro. Ka ho makatsa, ke Modimo ka boraro boo ka nako e le nngoe. Ha re lekole Moya O Halalelang. Moya O Halalelang O phela ka ho rona ha re ba Bakreste. Sekepana se hloka moya ho seng jwalo se ke ke sa sisinyeha. Moya O Halalelang O tshwana le moya ho sekepe sa bophelo ba Mokreste ka mong.

Bebele e ruta eng?

7 Leha ho le jwalo, ke le bolella nnete: ho molemo ho lona ha nka ikela; hobane ha ke sa ye, Moemedi a ke ke a tla ho lona; empa ha ke eya, ke tla mo romela ho lona. 8 Mme etlare hobane yena a tle, O tla kgodisa lefatshe, hore sebe se teng, le ho loka, le kahlolo: 9 sebe se teng, hobane ha ba dumele ho nna; 10 ho loka ho teng, hobane ke ya ho Ntate, mme le ke ke la hlola le mpona; 11 kahlolo e teng, hobane morena wa lefatshe lena o se a ahlotswe. 12 Ke sa na le ditaba tse ngata tseo nka beng ke le bolella tsona; empa haele jwale, di ka le imela. 13 Empa etlare hobane Eo a tle, e leng Moya wa nnete, O tla le tsamaisa nneteng yohle; hobane O ke ke wa bua o iqalla tsa wona; empa tsohle tseo O di utlwileng, O tla di bolela; le hona O tla le tsebisa tse tla tla. 14 Wona O tla ntlotlisa, hobane O tla nka tse ho Nna, O le tsebise tsona. 15 Tsohle tseo Ntate a nang le tsona, ke tsa ka; ke ka baka leo ke itseng: O tla nka tse ho Nna, O le tsebise tsona. Johanne 16:7-15 (SSO61-SO)

Hona ho bolela eng ho nna?

Moya O Halalelang ke mang? O bitswa 'Moemedi' (v7) e leng hore ke Motshedisi, Mweletsi, Mothusi hape ke ya matlafatsang. O bitswa 'Moya wa Nnete' (v13). Re nehilwe Moya O Halalelang ka lebaka lefe? Moya O Halalelang ke Mothusi wa hao (v7). Jesu O ne a khona ho ba sebakeng se le seng feela ka nako, empa ka Moya O Halalelang, a ka atleha ho ba le batho bohle ka nako e tshwanang. Ke ka hona ho leng molemo hore Jesu o bwetse Lehodimong (v7).

Moya O Halalelang a ka etsa eng? A ka kgodisa bao eseng Bakreste ho furalla sebe sa bona, ba latele Modimo (v8-10). O re thusa ho utlwisisa nnete ya Lentswe la Modimo, e leng Bibe (v13). O re tsebisa thato ya Modimo (v14). O re lebisa ho kgumamela le ho tlotlisa Jesu (v14). O re dumella ho latswa mohau wa Modimo o makatsang (v15). Ke ka lebaka lena ho tseba le ho mamela taelo ya Modimo ho ke keng ha khoneha kantie ho Moya O Halalelang! Ha re lebohe Modimo ka Motswalle Enoa le mpho ena e makatsang!

Nka etsa eng?

Ke ka mekhwa efe eo u elelletsweng tshebetso ya Moya O Halalelang bophelong ba hao? Rapela mme u kope Moya O Halalelang hore a sebetse ka ho fetisa bophelong ba hao.

Na u batla ho bala ho ya pele?

Esekiele 37:1-10 e fana ka setshoantsho se matla sa ka moo Moya O Halalelang O tlang phello e hlasimollang maphelong a badumedi. Hape o ka bala Johanne 14:16-17.

LETSATSI LA BO4: SEFAPANO

Ka nako ya Ntwa ya Lefatshe ya Bobedi sehlopha sa bo-ramahlale se ne se ntse se etsa sebetsa se kotsi sa ntwa. E mong wa basebetsi o ile a dihela sepame ka hare ho sesebedisoa se matla se kotsi. Ka ho tseba hore sebetsa se ne se tlo phatloha hang hang, e mong oa ditsebi o ile a nanabela sepame ka letsoho la hae. O ile a pholosa maphelo a bohle, empa a lahlehelwa ke bophelo ba hae ka ho angwa ke matla a kotsi mmeleng wa hae. Hona ke pale e re hopotsang molaetsa wa sefapano moo Jesu a ileng a shwela dibe tsa rona hore re se ke ra timela.

Bebele e ruta eng?

25 E ne e ka ba hora ya borobong, hoseng, ha ba mo thakgisa. 26 Lengolo le bolelang molato wa hae le ne le ngotswe tjena: "KGOSI YA BAJUDA." 27 Dinokwane tse pedi tsa thakgiswa le yena, se seng ka letsohong le letona, se seng ka ho le letshehadi. 28 Ha ba ha phethahala Mangolo a reng: "O baleletswe le ba kgopo." 29 Ba fetang ka tsela ba mo nyefola, ba ntse ba sisinya dihlooho, ba re: "Aha! Wena ya qhaqhang Tempele, mme o e tsose ka matsatsi a mararo, 30 ipholose he, ka ho theohe sefapanong!" 31 Ka mokgwa o jwalo le baprista ba baholo, le Ditsebi tsa Molao ba ne ba buisana, ba mo soma, ba re: "O pholositse ba bang, empa yena o sitwa ho ipholosa! 32 Krete, kgosi ya Israele, ha a ke a theohe sefapanong jwale, e le hore re bone, mme re dumele!" Le bona ba thakgisitsweng le yena ba mo hlapaola. 33 Ka hora ya leshome le metso e mmedi, lefifi la aparela lefatshe lohle ho fihlela ka hora ya boraro. 34 Yaba ka hora ya boraro Jesu O meketsa ka lentse le phahameng, O re: "Eloi, Eloi, lema sabakthani?" e leng ho re: "Modimo wa ka, Modimo wa ka, O ntahletseng na?" 35 Ba bang ba neng ba eme moo, ha ba mo utlwa, ba re: "Utlwang, o bitsa Elia!" 36 E mong wa bona a phakisa a matha, a ina semonyametsi aseneng, a se hloma leqaleng, mme a mo nea hore a nwe, a re: "Lesang, re ke re bone hore na Elia o tla mo fanyolla." 37 Jesu a meketsa ka lentse le phahameng, a neela moya. 38 Yaba lesira la Tempele le taboha ka lehare, ho tloha hodimo ho isa tlase. 39 Molaodi wa ba lekgolo ya emeng malebana le Jesu, ha a bona kamoo a neetseng moya kateng, a re: "Kannete motho enwa e ne e le Mora wa Modimo." Mareka 15:25-39 (SSO89SO)

Hona ho bolela eng ho nna?

Jesu O ile a shwa lefu le tshabehang, lefu le hlokanngoa toka hore bohle ba le bone. Empa ho sa bonwang ke ketsahalo ya ntho e mpe ho fetisisa. Jesu, ya hlokanngoa sebe, O ile a nka kotlo e lokelang sebe sa rona hore re fumane tshwarelo. Ke ka hona a ileng a utlwa Modimo a mo lahlele, a mo furaletse (v34). E itse hore Jesu a neele moya, lesira la Tempele le ile la taboha ka lehare ka bolona (v38). Hona ho bolela eng? Pele Jesu a ka tla a phela lefatsheng, Bajuda ba ile ba aha tempele. Modimo O ne a phela ka hare ho eona, ka Sehalalelong se halalelang ka ho fetisisa, "Sehalaledisiso". Ho ne ho se motho ya ka kenang kapa a feta lesira la karolo ya Sehalaledisiso kantle ho Moprista e Moholo ya neng a kena ha nngwe ka selemo. Hona ho ne ho hopotsa setjhaba hore sebe sa bona se seholo mme se ba arohantse le Modimo. E itse hore Jesu a shwe sefapanong, lesira le ile la taboha ka lehare ka mokhwa o phahametseng tlhaho. Hona ho bolela hore mokwallo dipakeng tsa baetsadibe (e leng rona) le Modimo o fedisitsoe ke sehlabelo sa Jesu. Monyako o se o butswa hore re phele haufinyane le Modimo, ho sa tsotelehe dibe tsa rona tse fetileng ka ha re se re di tshwaretse. Ruri, ke ditaba tse molemo! Jesu O re fa tokoloho molatong mme A re fe dikamano tse tiileng le Modimo. Hona ho re ama ha feela re amohela tshwarelo ea Jesu ka madi a Hae a ileng a re tsholohela, hape ha re kena monyakong oo re o buletsweng, ka ho beha tumelo ya rona ho Jesu Krete le ho sefapano sa Hae.

LETSATSI LA BO5: TUMELO HO KRESTE FEELA

Ngwanana e monyenyanane o ne a batla ho atamela Modimo. Bosiu bo bong Modimo a mo fa toro. Torong eo, ngwanana enwa o ne a batla ho hlwa lefika ho fihlela Modimo ka hodim'a lefika leo. O ile a leka ka makgetlo, empa a sitwa ho fihlela ka hodimo ho lefika. Ka lebaka la mokgathala le ho hlonama, o ne a se a itukiseditse ho tela a theohe lefika. Ke moo a ileng a bona ntho e qhomisang e le mosikong wa lefika. O ile a itlohela lefikeng, a wa fatshe hodima ntho e qhomisang, eo e ileng ya mo qhomisa hodimo, mme a fihlela tlhorong ho Modimo. Re atamela Modimo re be haufi ho Eena joang? Ka ho itlohela, mme re qhome.

Bebele e ruta eng?

1 "Pelo tsa lona di se ferekane. Dumelang ho Modimo; le ho nna le dumele.

2 Ka tlang ya Ntate ho na le meaho e mengata; hoja ha ho jwalo, nka be ke le boleletse, hobane ke ya ho le lokisetsa bodulo. 3 Ha ke se ke ile, ke le lokiseditse bodulo, ke tla boela ke tle ke le nkele ho nna, hore moo nna ke leng teng, le lona le be hona teng. 4 Ebile moo ke yang, tsela ya teng le a e tseba." 5 Thomase a re ho yena: "Morena, ha re tsebe moo o yang teng; tsela re ka e tseba jwang na?" 6 Jesu a re ho yena: "Ke nna tsela, le nnete, le bophelo; ha ho ya ka tlang ho Ntate haese ka nna. 7 Ha le ntseba, le Ntate le a mo tseba. Ho tloha jwale le a mo tseba, le bile le mmone." 8 Filipi a re ho yena: "Morena, re bontshe Ntate, e be ho re lekane." 9 Jesu a re ho yena: "Ke bile le lona nako e kaakaale, empa ha o a ka wa ntseba, Filipi? Ya mponeng o bone Ntate; o bolela jwang ha o re: "Re bontshe Ntate"? Johanne 14:1-9 (SSO89SO)

Hona ho bolela eng ho nna?

Re ke ke ra atamela Modimo ka ho hlwa 'lefika' la diketso tsa boitshwaro le tsa borapedi, e le ho leka ho ithwekisa. Jesu O tlile hore lokolla leshanong la hore re ka ipholosa. Re fihlela le ho lokafatswa ke Modimo ka tumelo ho Jesu le ho shwela ha dibe tsa rona (v6). Ho tla jwang ditumelo tsa lefatshe di leng ngata hakaale? Karabo: Kaofela ha tsona di leka ho fihlela Modimo ka matla a motho. Tumelo ya Bobuddha e na le tsela e menahaneng makhetlo a robedi. Tumelo ya Bomoslem e na le melao e mehlanano. Tumelo ya Bohindu e lumela ho ditlamorao (sesosa le phello) tse salang motho maphelong a mang a hae a bokamoso. Tumelo ea Bojuda e lumela ho dibuka tse hlano tse hlahang pele ka Bibeleng.

Leha ditumelo tsena di fana ka dikaroloana tsa nnete le botle bo ka ananeloang, di etsa phoso ka ho nahana hore re ka fihlela Modimo ka mesebetsi ya rona. Kaofela ha tsona di re re hloka ho hlwa lere ho fihlela Modimo.

Ke eng e etsang Bokreste bo ikhethe? Karabo: Leha borapedi e le mokhwa oo batho ba lelang ho fihlela Modimo, Bokreste ke mokhwa oo Modimo a lelang ho fihlela batho.

Ka ha re ke ke ra fihlela Modimo ka boiteko le mesebetsi ya rona, O tla ho rona hang ha re tshepa ho mohau wa Hae oo re sa o lokelwang! Krete O tshwana le ntho e re qhomisang ya mohau. Ha re itshepela ho Krete re hlola boima ba dipelo tsa rona (v1), tshabo ya lefu (v3), le ho hloka tsebo ya hore Modimo ke mang. Ke ka ho Krete feela moo re fumanang tsela, nnete, bophelo le kamano le Modimo e le Ntate wa rona (v6). Ke mohau o makatsang hakaakang!

Nka etsa eng?

Na u se u emisitse ho beha tshepo ho bokhoni le mesebetsi ya hao e le ho leka ho fihlela kamohelo ya Modimo? Na u itshepetse feela ho ntho e qhomisetsang ho Jesu, mohau wa Hae oo re sa o lokelang, hore u fumane kamohelo ya Modimo? Na ho na le letho le u thibelang ho itihela ho Jesu?

Na u batla ho bala ho ya pele?

Bala Baefese 2:8-10 le Baroma 10:2-4 ho bona ka moo borapedi le diketso di sa tlo re pholosa, empa e leng mohau wa Modimo o pholosang.

LETSATSI LA BO6: PHOLOHO

Ntate e mong wa Spain o ne a batla ho boelana ka kgotso le mora wa hae ya dulang sebakeng sa Madrid. O ile a etsa tsebiso koranteng ya El Liberal e baleha ka hore: "Paco, kopana le nna Hoteleng ya Montana ka thapama, Labobedi. Tsohle di tshwaretse. Ntate wa hao." Paco ke lebitso tlwaelehileng naheng ya Spain, mme ha Ntate eo a fihla hoteleng o fumane bashemane ba bitswang Paco ba makgolo a robedi ba emetse ho kopana le bontate ba bona. Botebong ba pelo tsa rona kaofela re labalabela lehae leo re ratuwang ntle le maemo. Ha re shebe phano ya Modimo ya mohau ho rona:

Bebele e ruta eng?

11 Jesu a re: "Monna e mong o ne a ena le bara ba babedi. 12 E monyenyanane a re ho ntatae: 'Ntate, mphe karolo ya leruo eo e leng ya ka.' A ba arolela leruo la hae. 13 "Kamora matsatsi a se makae, mora e monyenyanane a bokella tsohle, a fallela lefatsheng le hole, mme teng a hafa leruo la hae ka ho phela habohlaswa. 14 Yare hoba a hafe tsohle, ha wa tla e kgolo lefatsheng leo, mme a qala ho hloka. 15 A tholwa ke e mong wa baahi ba lefatshe leo, mme eo a mo romela naheng ho ya alosa dikolobe. 16 O ne a bile a lakatsa ho ja ditholwana tsa difate tse jewang ka dikolobe, empa ho se ya mo fang. 17 "Eitse hoba a ikelellwe, a re: 'Bahiruwa ba bangata hakaakang ba ntate ba jang ba be ba di shebe feela, empa nna mona ke bolawa ke tla. 18 Ke tla tsamaya, ke ye ho ntate, ke re ho yena: Ntate, ke sitetswe lehodimo le wena: 19 Ha ke sa lokela ho bitswa mora wa hao; ako nketse e mong wa bahiruwa ba hao.' 20 A tsamaya, a ya ho ntatae. "Yare a sa le hole ntatae a mmona, a mo utlwela bohloko, a matha, a mo kopa ka molala, a mo aka. 21 Mora a re ho yena: 'Ntate, ke sitetswe lehodimo le wena: Ha ke sa lokela ho bitswa mora wa hao.' 22 "Empa ntatae a re ho bahlanka ba hae: 'Phakisang le tlise seaparo se setlesetle, le mo apesa sona, le mo rwese lesale monwaneng, le meqathatso maotong. Luka 15:11-22 (SSO89SO)

Hona ho bolela eng ho nna?

Sebe se re arohanya le Modimo ya re ratang (v13). Qetellong karohanyo ena e utlwisa Modimo bohloko jwaloka ha e re utlwisa bohloko (v14,15). Monyetla wa ho boela hae o dula o le teng. Ha re kgutlelwa ke kelello, re furalla sebe mme re beha tshepo ya rona ho Modimo (v17-20), re tla amohelwa ka qenehelo, ka diatla tse photholohileng, ka tshwarelo, ka thabo le ka ditlhohonolofatso (v20-25). Pale ena ke setshwantsho se hlolang sa pholoho le kamano eo Modimo a lakatsang ho ba le yona le rona.

Pale e nngoe ke ena. Ntate e mong, ha a kgutla lebenkeleng, o ile a tshwara moradi wa hae a tletse lehlabathe ka hanong. O lekile ho tshosa le ho rapela moradi wa hae ho tshwela lehlabathe empa moradi o ile a hana, hobane o ne a rata tatso ya lehlabathe. Ke moo a ileng a hlahisa leqhwa le tswekere leo a neng a reketse moradi wa hae, mme moradi a tshwela lehlabathe hanghang. Ha Modimo a re re tlohele sebe mme re Mo latele, ha se hobane a batla ho re amoha boithabiso. Ke hobane O na le ho hantle ho fetisa bakeng sa rona. O re neha tshwarelo, bophelo bo sa feleng le kamano ya nnete le Yena.

Nka etsa eng?

Na ho na le sebe kapa bohloko bo u thibelang ho ba le lehae le Modimo? Ho tswa paleng e ho Luka, Modimo Ntate o fapane ka mokhwa ofe ho ntate wa hao wa letswele?

Na u batla ho bala ho ya pele?

Bala Baefese 2:1-10 ho fumana lesedi le fetang mabapi le seo re pholositsweng ka ho sona le hore re bolokehile ho eng.

LETSATSI LA BO7: TSOHO YA JESU

Na ho na le motho wa bohlokwa ho wena a hloka hetseng? Haeba ho jwalo, u tseba ka moo lefu le nang le phelo ebile le sithabetsang ka teng. Ho na le ntho e le nngwe eo re ka kgodisehang ho yona - kaofela re tlo shwa. Ha metsoalle ya Jesu e mmona a shwa lefu le mahlonoko, ba ile ba tsieleha. Ke hobane ba ne ba lebetse hore Jesu O ne a entse tshepiso ya ho kgutla. Na u kile wa ipotsa hore na Jesu O ntse a phela, na tumelo ya Bokreste ke nnete, le hore na ho na le bophelo kamora lefu? Ho na le ketsahalo e makatsang e arabang dipotso tsa hao kaofela.

Bebele e ruta eng?

1 Ha Sabatha se fetile, ho hlaha mafube a letsatsi le qalang beke, Maria wa Magdala le Maria e mong ba tla ho bona lebitla. 2 Bonang, tshisinyeho e kgolo ya lefatshe ya eba teng, hobane lengeloi la Morena le ne le ila la theoha lehodimong, la fihla, la phikolosa lejwe, mme la dula hodima lona. 3 Sebopeliso sa lona se ne se ka lehadima, mme seaparo sa lona se ne se le sesweu jwaloka lehlwa. 4 Balebedi ba thothomela ke ho tshaba, ba eba jwaloka bafu. 5 Lengeloi la re ho basadi: "Lona le se ke la tshoha; ke tseba hore le batla Jesu ya thakgisitsweng. 6 Ha a yo mona, hobane o tsohile, jwalokaha a ne a bolele. Tloong, le bone sebaka seo a neng a le ho sona. 7 Le phakise le yo bolella barutuwa ba hae, le re: 'O tsohile bafung, mme o le etella pele ho ya Galelea; le tla mmona teng.' Jwale ke le boleletse." 8 Ba tloha kapele lebitleng, ka tshabo le ka thabo e kgolo, ba matha ho ya tsebisa barutuwa ba hae. 9 Jesu a teana le bona, a re: "Dumelang!" Ba atamela, mme ba mo tshwara maoto, ba mo kgumamela. 10 Yaba Jesu o re ho bona: "Se tshabeng, eyang le tsebise bana beso hore ba ye Galelea, mme ba tla mpona teng." Matheu 28:1-10 (SSO89SO)

Hona ho bolelang eng ho nna?

Tsoho ya Morena Jesu bafung e bolela eng ho rona? E bolela hore Jesu ke Modimo ka sebele. Ke ka lebaka lena basadi, bo-Maria, ba ileng ba mo kgumamela (v9). Ke ka lebaka lena ba ileng ba ba le sebete sa ho phatlalatsa ho batho bohle (v10). Ho bolela hore Bokreste ke tumelo ya nnete. Monna e mong ya bitswang Josh McDowell ya sa dumeleng ho Modimo, o kile a leka ho paka hore tsoho ya Jesu bafung ha ya ka etsahala, empa kamora ho sheba bopaki bo ngotsweng, o ile a kgodiseha hore Jesu O tsohile bafung.

O ile a ba Mokreste mme a ngola buka e bitswang "*The Resurrection Factor*" e pakang tsoho ya Jesu e le nnete ya nalane ya lefatshe. Ho bolela hore re ka kgodiseha ka bophelo bo sa feleng. Ka tsela e tshwanang eo Jesu a phetseng kamora lefu, O re tshepisa hore re tla newa bophelo bo sa feleng ha re mo tshepa. Ho bolela hore Jesus Wa phela. Hona ho kgetholla Jesu ho bathehi ba ditumelo tse ding tsa lefatshe. Ke Yena feela ya senang lebitla! Ho bolela hore re ba lehlohonolo. Jesu O itse, mabapi le tsoho ya Hae, "Na o dumetse kahobane o mpona? Ho lehlohonolo ba dumelang leha ba sa ka ba bona." (Johanne 20:29 SSO89SO)

Nka etsa eng?

Tshoho ya Jesu bafung e bolela eng ho wena?

Na u batla ho bala ho ya pele?

Bala 1 Bakorinthe 15:21-22. Bala Tshenolo 1:9-18 ho bona "Ya Tsohileng" sefahla-mahlo.

LETSATSI LA BO8: HO LATELA JESU

E etse feela! Hona ke lepetjo la Nike, empa e hlalosa tshusumetso ya leloko la kajeno. Kajeno, batho ba bangata ba ipitsa Bakreste empa ha ba etse jwaloka Bakreste. Ha ba batle le ho mamela Modimo eo ba ipolelang ho dumela ho Yena. Bakreste ba pele ba ne ba sa ipitse Bakreste, empa ba ne ba bitswa barutuwa kapa balatedi ba Jesu. Ha re shebe batho ba bileng le monyetla o kgethehileng wa ho latela Jesu mme ba etsa jwalo.

Bebele e ruta eng?

17 Ho tloha nakong eo, Jesu a qala ho ruta, a re: "Bakang, hobane Mmuso wa mahodimo o atametse!" 18 Yare ha Jesu a sika le letsha la Galelea, a bona bara ba babedi ba motho, Simone ya bitswang Petrose le Andrease ngwanabo, ba ntse ba akgela letlowa letsheng, hobane e ne e le batshwasi ba ditlhapi. 19 A re ho bona: "Ntshaleng morao, mme ke tla le etsa batshwasi ba batho." 20 Hanghang ba tlohela matlowa a bona, ba mo latela. 21 Hobane a fetele pele, a bona bara ba bang ba babedi ba motho, Jakobo mora wa Sebedea le Johanne ngwanabo, ba ena le ntata bona Sebedea ka sekepeng, ba ntse ba lokisa matlowa a bona, mme a ba bitsa. 22 Hanghang ba tlohela sekepe le ntata bona, ba latela Jesu. 23 Jesu a tsamaya le Galelea yohle, a ntse a ruta matlung a thapelo a teng, a phatlalatsa molaetsa o molemo wa Mmuso, a fodisa mafu le malwetse wohle setjhabeng. Matheu 4:17-23 (SSO89SO)

Hona ho bolela eng ho nna?

Ho bolela dintlha tse tse tshelletseng: 1) Makatswa ke bohlae le matla a hae. Na lebaka le leng le teng ka ntle ho lona leo batho bana ba ka mo latelang ka tjheseho e kaalo (v20)? Jesu O na le bohlae le matla ao re a hlohang ho phela bophelo ka botlalo. 2) Qala kamano le Eena. Ketsahalo ena e bile qalo ya setswalle se senang ho fela dipakeng tsa Jesu le batho bana. Jesu O batla ho ba motswalle wa rona ka ho tshwanang. 3) Latela mohlala wa Hae. Ha nako e ya batho ba ile ba bua ka moo banna bana ba neng ba bonahatsa Jesu maphelong a bona (Diketso 4:13). Jesu O batla, hape O khona, ho re fetola hore re tshwane le Yena haholwanyane. 4) Dumela mme u mamele thuto ya Hae. Barutuwa bana ba ile ba nka thuto ya Hae ka botebo. E ile ya ama mokhwa oo ba phetseng ka teng (v17-23). Dithuto tsa Jesu di ka re lebisa ho nahana ka nepo le ho phela ka tjheseho. 5) Ikopanye le Yena morerong wa Hae wa ho fihlela batho. O ile a tshepisa Petrose le Andrease hore O ne a tlo ba sebedisa ho fetola maphelo a batho (v19). Tshepiso eo e ya re ama le rona. 6) Efa Jesu botshepehi ba hau bo phahameng. Batho bana ba ile ba tlohela mesebetsi ba siya malapa a bona hanghang (v22). Eng kapa eng eo re e leselang ha se letho ha e bapiswa le moruo o re o fumanang. Qeto ya bohlokwahadi e re ka e nkang ke 'ho etsa feela' mme re latele Jesu.

Nka etsa eng?

Na u entse qeto ya ho latela Jesu? Haeba ha ho jwalo, lebaka ke lefe? Ho dintlha tse tshelletseng tse boletsweng tsa ho latela Jesu, ke efe e u qholotsang ka ho fetisa?

Na u batla ho bala ho ya pele?

Bala Luka 5:1-11 ho fumana phetolelo e teletsana ya pale ena.

LETSATSI LA BO9: MELEMO YA KA HO SA FELENG

Ka letsatsi le leng monna e mong o kile a tsamaya ka sekepe lewatlang. O ne a khona feela ho patalla leeto, jwale ha batho ba ya dijong, o ne a dula a le mong a ja bohobe ba kgale. Ha ba fihla moo ba yang, motsamaisi wa sekepe o ile a mo botsa, 'Hobaneng u sa ka wa tla dijong? Dijo di ne di le karolo ya theko ya tekete.' Pale ena e re hopotsa batho ba bangata ba nahanang hore ho tshepa Jesu ho fana ka molemo wa ho ya lehodimong feela. Ho ba Mokreste ho bolela hore re fuwe melemo e metle bophelong bona.

Bebele e ruta eng?

14 Bohle ba tsamaiswang ke Moya wa Modimo ke bana ba Modimo. 15 Moya oo le o amohetseng hase moya wa bokgoba o boelang o le tshabisa, empa ke moya o le etsang bana ba Modimo, oo re howang ka wona, re re: "Abba!" ke ho re: "Ntate!" 16 Ka sebele sa wona, Moya wa Modimo o pakelana le meya ya rona hore re bana ba Modimo. 17 Ha re le bana ba Modimo, re majalefa, majalefa a Modimo; re majalefa hammoho le Krete, ha re fela re ena le kabelo mahlokong a hae, hore re tle re be la kabelo tlotlisong ya hae.

Baroma 8:14-17 (SSO89SO)

Hona ho bolela eng ho nna?

Ho etsahala eng ha re tshepa ebile re latela Jesu? Re newa Moya O Halalelang (v14). Moya O Halalelang ke boteng ba Modimo bo tlang ho phela ka ho rona. Re amohela boitsebiso bo bocha re le bana le majalefa a Modimo (v16,17). Ha rea tlameha ho ba le tshabo ya ho lahlwa ke Modimo. Rea itseba hobane re tseba eo re leng wa Hae. Re amohela memo ya ho natefelwa ke Modimo e le Ntate wa rona ya re ratang (v15). Re se re ka ba le dikamano le Yena moo re mo bitsang Abba (ho bolela 'Ntate wa ka'). Re amohela tshepiso ya hore Modimo a ke ke a emisa ho re rata, ho sa tsotellehe letho (v35-39). Tseno ke ditshepiso tse makatsang. Ka bomadimabe, Bakreste ba bangata ba di lebala kapa ba sokola ho di dumela. Hona ho tshwana le pale ya letata le lebele ne le sitoa ho kenella le matata a mang, ho fihlela le fumana hore e ne e le khantshi e ntle haholo. Ho sibollwa ho bakile hore e otlolle mapheo a ona ebe e fofa ka lekgetlo la pele! Ha re sebediseng molemo oo re o fumaneng mme re qalelle ho jella tafoleng ya Morena Modimo. Ha re sebediseng mapheo a rona re qalelle ho fofa hodimo ka hara ditshepiso tsa Modimo.

Nka etsa eng?

Na u dumela ho ditshepiso tse? Tumelo ya hau e ne e thehilwe maikutlong a hau a fetohang kapa ho dintlha tsa nnete tse sa fetoheng tsa Lentswe la Modimo?

Na u batla ho bala ho ya pele?

Sheba Baefese 3:14-19 ho bala ka tsela e eketsehileng ka lerato la Modimo.

KGATO YA KA E LATELANG KE EFE?

Na o karolo ea dihlotshwana tsa dikereke tsa lehae? Dihlotshwana tsa dikereke tsa lehae ke sebakeng seo o fumanang metswalle le moo le holang moyeng hammoho. Re dumela hore bophelo bo monate hammoho le ba bang le hore phetoho ya nnete ya bophelo e etsahala maemong a dikamano. Re ka thabela ha u ka fumana metswalle, ka hoo u ka re etela tafoleng ya dikereke tsa lehae (Groups) ka Sontaha kerekeng kapa u ka batla Groups moo marangrang www.hillsong.com/southafrica.

LETSATSI LA BO10: BEBELE

Modimo Ha se Yena a ngotseng Bebele. Empa O ile a susumetsa bangodi ba yona ba mashome a mane ho e ngola, ho kenyeletswa palong ya bona seroki, morena, modisa, ngaka, mmokelli wa lekgetho le motshwasi wa ditlhapi, mme ba ile ba ngola dibuka tse fapaneng ka nako ya dilemo tse sekete le makgolo a tsheletseng. Testamente ya khale (ka dibuka tse mashome a mararo a metso e robong) e ngotswe pele Jesu a ka tla lefatsheng. Testamente e Ncha (ka dibuka tse mashome a mabedi a metso e supileng) e ngotswe kamora Jesu a tle lefatsheng. Modimo O netefaditse hore ba ne ba ngola seo a neng a batla ba se ngole le hore Bebele e tshwere nnete ya hore Modimo ke mang, O entseng le seo a ntseng a se etsa, hammoho le mokhwa wa ho ba le likamano le Yena. Lefatshe la nako Ya Bibe le fetohile, empa molaetsa wa yona o setse e le nnete hape o le bohlokwa kajeno jwaloka pele.

Bebele e ruta eng?

9 Mohlanka o tla hlwekisa metsamao ya hae jwang? Ke ha a e ela hloko ka ho e bapisa le lentswe la Hao. 10 Ke O batla ka pelo ya ka yohle; O etse hore ke se ke ka kgeloha ditaello tsa Hao. 11 Ke boloka lentswe la Hao ka pelong ya ka, hore ke se ke ka O sitelwa.

12 O bokwe, Jehova! Nthute dikomelo tsa Hao! 13 Melomo ya ka e ntse e pheta dikahlolo tsohle tse tswileng molomong wa Hao. 14 Ke ithabela tseleng ya dikeletso tsa Hao, jwaloka hoja eka ke ruile maruo kaofela. 15 Ke rata ho nahana ditemoso tsa Hao, le ho bea ditsela tsa Hao pela mahlo a ka. 16 Ke ithabisa ka dikomelo tsa Hao, ha ke le bale lentswe la Hao.

17 O etse mohlanka wa Hao hantle, ke tle ke phele, ke boloke lentswe la Hao. 18 O tutubolle mahlo a ka, ke tle ke bohise mehlolo e patilweng molaong wa Hao. 19 Ke osele lefatsheng, O se ke wa mpatela ditaello tsa Hao. 20 Moya wa ka o robe hile ke ho hlolohelwa ditaello tsa Hao kamehla. 21 O laya baikakasi, e leng batho ba rohakilweng, ba fapohang ditaello tsa Hao.
Dipesalema 119:9-21 (SSO61-SO)

Hona ho bolela eng ho nna?

Hobaneng o lokela ho ba le tjantjello ho Lentswe la Modimo? Le re thusa ho ba le metsamao e hlwekileng (v9) e sa sitelweng Morena (v11). Le re tlatsa ka thabo (v14) le ho makala (v18). Le fepa meya ya rona jwaloka mahe a dinotsi a fepa mmele ya rona (v103). Le re tataisa ha re etsa diqeto, jwaloka ha tsela e re tataisa ha re lahlehile (v105). Le re fa kutlwisiso (v104). Re ba le tjantjello ho Lentswe la Modimo jwang? Ka ho le latela. Le boloke pelong ya hao (v11). Iphetele u be u phetele ba bang Lentswe La Modimo (v13). Le baballe (v14). Thuisa Lentswe khafetsa, u le behe pela mahlo a hao ho fihlela le fetoha karolo ya hao (v15). O se ke wa le le bala (v16). Kopa Modimo hore A o tutubolle mahlo ha o bala le ho utlwa Lentswe (v18). Eba le tabatabelo ya lona (v20). Ikokobetse, o se ke wa ikgohomosa ha o le utlwa (v21). Natefelo a ho lona (v103). Ha hwa lekana ho ithuta le ho ba le tsebo ya Lentswe la Modimo. Lentswe la Modimo le lokela ho kena dipelong tsa rona hore le re fetole. Ka nako yohle ha o le bala le ho le utlwa, kopa Modimo ho bua le wena ka Lentswe la Hae.

Nka etsa eng?

Ke karolo efe eo Bebele e e phethileng bophelong ba hau ho fihlela joale? O ka eketsa botebo ba Bebele ka ho wena jwang?

Na u batla ho bala ho ya pele?

Bala Joshua 1:6-9 le 2 Timothea 3:14-17 ho tseba ka ho fetisa. Bua le rona ka sekolo sa mantsiboya ho ithuta ka botebo ka Lentswe la Modimo.

LETSATSI LA BO11: KEREKE

Ha u ka tlosa patsi e tukang mollong, e tlo tima. E hloka dikotoana tse ding tsa patsi hore e nne e tuke hantle.

Ka mokhwa o tshwanang, tjheseho ya rona ho Modimo e ya timeha ha re leka ho latela Jesu re le bang mme re sa ikopanye le kereke e ratang Modimo.

Dihlooho tsa ditaba Lehodimong ha di bue ka dipolotiki kapa dikhalala tse tummeng. Di bua ka se etsahalang kerekeng ya Modimo lefatsheng ka bophara.

Kereke ke lelapa la Modimo. E phela ho bonahatsa Modimo le molaetsa wa Hae sechabeng seo e behilweng ho sona. Ha se moaho kapa kopano. Kereke ke batho.

Ha re ba Modimo feela, empa re ipitsa ka batho ba bang. Bophelo ba Bokreste ke ba bonngoe.

Ha se bophelo ba motho ya mathang a le mong. Ha re shebe kereke ha e le maemong a matle ka botlalo:

Bebele e ruta eng?

41 Yaba ba amohetseng polelo ya hae ka thabo ba kolobetswa, mme barutuwa ba ekeletswa tsatsing leo ka batho ba dikete tse batlileng ho ba tharo. 42 Ba ne ba tiisetsa thutong ya baapostola, le kopanong ya boena, le ho ngwathweng ha bohobe, le merapelong.

43 Tshabo ya wela batho bohle, mme mehlolo le meeka e mengata ya nna ya etswa ke baapostola. 44 Bohle ba dumetseng ba ne ba dula hammoho; ba ne ba teanya dintho tsa bona kaofela hore e be tsa bohle. 45 Ba ne ba rekisa ka masimo a bona le ka mesebetsi ya bona, mme ba ne ba abela bohle, kamoo e mong le e mong a hlohang kateng. 46 Ba ne ba tiisetsa tempeleng ka matsatsi wohle, ba le pelo e le nngwe; enereha ba etswa tlung e nngwe, ba ne ba kena ho e nngwe, ba ntse ba ngwatha bohobe; ba ne ba eja dijo tsa bona ka thabo le ka dipelo tse monate, 47 ba boka Modimo, mme ba kgahlisa setjhaba kaofela. Mme Morena a nna eketsa kereke ka tsatsi le leng le le leng ka batho ba bolokehang. Diketso 2:41-47 (SSO61-SO)

Hona ho bolela eng ho nna?

Pale ena e bontsha ka moo re ka bang kereke. Inehela ho rutwa le ho phela ka Lentswe la Modimo. Etsa sohle seo u ka se khonang ho utlwisisa le ho mamela Bebele ka botebo o le hammoho le ba bang. Aha dikamano tse tiileng. U se ke wa ya dikopanong feela; kena malapeng a ba bang le maphelong a bona. Ngwathang bohobe hammoho. E-ja bohobe le veine/seno mmoho le ba bang, ho hopola lefu la Krete (bala 1 Bakorinthe 11:23-29).

Rapelang le rorise Modimo hammoho. Atamelang haufi le Modimo hammoho ka tebello ya hore O tla senola Boyena le mekhwa ya Hae ho lona haholwanyane. Tsotellanang.

Lekang ho thusana, haholo ba bohlokong. Hohelang batho ba kantle. Ho se arolele batho ka Modimo ke boithathi, ka hoo jwetsa ba bang ka molaetsa wa tumelo ya hao, u ba memela ho tla dikopanong tse itseng. U se ke wa tela. Kereke ke sehlopha sa batho ba sa phethahalang ba hokahantsweng ke Hlooho e phethahetseng, e leng Jesu. O re fa mohau wa ho se nyatse baetapele ba rona le ba bang. O batla ho ba karolo ya tharollo e seng karolo ya tsietsi.

Nka etsa eng?

Tatso ya hao ya kereke ke e jwang? Na u tseba ka kereke e boletsweng? Ke eng e u thibelang ho ba karolo ya phutheho?

Na u batla ho bala ho ya pele?

Sheba Baheberu 10:24-25 ho tseba ka ho fetisa. Bala 2 Timothea 4:2-5 ho fumana ditemoso mabapi le dikotsi tsa dikereke tseo thuto ya tsona e tlatseng diphoso. Ho utlwisisa lebaka la Bakreste la ho arolelana dijo le ho ngwatha bohobe hammoho bala 1 Bakorinthe 11:23-29.

LETSATSI LA BO12: THAPELO

Ho phetwa ka pale ya batho ba pele ba Sudan ba ho sokoleha ho Bokreste hore ba ile ba itlama ho rapela letsatsi le letsatsi. E mong le e mong o ne a na le sebaka sa hae ka morung moo a neng a tshollela pelo ya hae ho Modimo. Ha nako e ntse e feta, tsela e yang dibakeng tsena e ile ya fela. Ka lebaka leo, haeba e mong wa balumedi o ne a qalella ho hlokomoloha thapelo, ho ne ho bonahala kapele ho ba bang. Ka mosa ba ne ba tla hopotsa ya hlokomolohileng, "Ngwaneso, jwang bo mela tseleng ya hao".

Bebele e ruta eng?

6 Empa wena, ha o rapela, kena phaposing ya hao, mme ha o kwetse monyako wa hao, o rapele Ntatao ya sephiring; mme Ntatao ya sephiring, o tla o putsa. 7 Ha le rapela, le se ke la touta jwaloka bahetene, hobane ba hloma ba tla utluwa ke ho bua haholo. 8 Empa le se ke la tshwana le bona; hobane Ntata lona O tseba seo le se hlohang, le eso ho qele ho Yena. 9 Jwale lona, rapelang jwalo, le re: Ntata rona Ya mahodimong, lebitso la Hao a le ke le kgethehe; 10 ho tle Mmuso wa Hao; thato ya Hao e etswe lefatsheng, jwalokaha e etswa lehodimong; 11 O re fe kajeno bohobe ba rona ba tsatsi le leng le le leng; 12 O re tshwarele melato ya rona, jwalokaha re tshwarela ba nang le melato ho rona; 13 O se ke wa re isa molekong; O mpe O re lwele ho e mobe; [hobane mmuso ke wa Hao, le matla, le kganya ka ho se feleng. Amen! Matheu 6:6-13 (SSO61-SO)

Hona ho bolela eng ho nna?

Re lokela ho rapela jwang? Tlosa ditshitiso mme u tsepamise pono ya hao ho Modimo ya nang le wena. O na le tjheseho ya ho araba thapelo ya hao (v6). U se ke wa leka ho Mo kgahlisa ka dipuo tsa bodumedi tse majabajaba (v7). Hlahisa teboho, maswabi, bohelehele, lerato, eng kapa eng. Hobaneng re lokela ho rapela? Ho na le dintho tse ngata tseo re ka rapelang ka tsona: shebana le eo Modimo e leng yena mme O mo joetse hore na O mo rata ha kae (v9). Nahana ka seo a se batlang bakeng sa hao le lefatsheng le u potileng; ebe O mo mema hore a phethahatse thato ya Hae (v11). Kopa tshwarelo ka dibe tsohle tseo u di entseng (v12). Fa Modimo bohloko ba hao hape o tshwarele ba u sitetsweng (v12, v14). Mo kope ho u sireletsa molekong le ho diabolosi (v13). Re lokela ho rapela neng? 'Se phetseng ho rapela' (1 Bathesalonika 5:17). U ka dula u bua le Modimo u sa kgaotse. Tiisetsa thapelong nakong eo ho bonahalang eka ha A mamela. Tseba hore O mametse. Hape, elleloa hore ha se ntho e nngwe le e nngwe eo u e kopang, e leng ntho eo u hlileng u e hlohang kapa eo u seng u itukisitse ho e amohela. E-ba le mamello. Kopa Moya O Halalelang ho u thusa ho rapela. Dula u hokahane.

Nka etsa eng?

U rapela ha kae? U ka etsa jwang hore bophelo ba hao ba thapelo e be bo kgahlisang le ba nnete? Na u ka leka ho bala Dipesalema 42 ka ho e pheta ka molomo, o e etsa e be thapelo ya hao ho Modimo?

Na u batla ho bala ho ya pele?

Bala Jakobo 4:2 le Matheu 26:42 ho tseba hobaneng dithapelo tse ding di sa arabelwe

O batla go buisa go ya pele?

Bona Jakobo 4:2 le Matheo 26:42 go bona gore goreng dithapelo tse dingwe tsa rona di sa arabiwe.

LETSATSI LA BO13: THOLOANA YA MOYA

Ha Michelangelo a botswa hore na u entse sefika sa Davida jwang, ho tlalehwa a ile a re "Ke shebile ka hare ho lehlakwe, ka tlosa dikotoana tseo e seng Davida". Modimo ke Mmetli wa maphelo a rona. O batla hore re fetohle ho ba jwaloka Jesu. O batla ho tlosa hanyane ka hanyane sohle se sa tshwaneng le Krete se kahare ho rona. Ha re pholoswa re amohetse ho hlweka le ho loka hwa Jesu, empa eseng sebopeliso sa Hae. Hoo ho nka nako, kutlo le thuso ya Moya O Halalelang ho hodisa.

Bebele e ruta eng?

16 Mme ke re: *Tsamayang ka Moya, mme le se ke la kgodisa ditakatso tsa nama.*

17 Hobane nama e na le ditakatso tse lwantshang Moya, mme le wona Moya o na le ditakatso tse lwantshang nama; mme ntho tseo di emellane ho lwantshana, hore le tle le se ke la etsa tseo le di ratang. 18 Ekare ha le tsamaiswa ke Moya, ha le pusong ya molao.

19 Mme mesebetsi ya nama e pepeneneng: Ke ho feba, le ho boka, ke bonyala, le bootswa;

20 ke ho rapela medimo ya bohata, le boloi, ke hloyano, le dikomang, ke mona, le bohale, le dikgang, le diphapang, le dikgaohano; 21 ke mohono, le dipolao, le botahwa, le meharo, le

dintho tse jwalo, tseo ke le bolellang, jwalokaha ke se nkile ka le bolella, hore ba etsang tse jwalo, ba ke ke ba ba rua mmuso wa Modimo. 22 Empa tholwana ya Moya ke lerato, le thabo, le kgotso, le sebeti, le kgauho, le molemo, le botshepehi, le bonolo, le boitshwaro.

23 Ha ho molao o hanang tse jwalo. 24 Mme bao e leng ba Krete, ba thakgisitse nama, le

dithato, le ditakatso tsa yona. 25 Ekare ha re phela ka Moya, a re keng re tsamaye le ka Moya.

Bagalata 5:16-25 (SSO61-SO)

Hona ho bolela eng ho nna?

Jesu O ne a tletse lerato, thabo, kgotso, mamello, mosa, molemo, botshepehi, bonolo le boitshwaro, mme O ntse a le jwalo le kajeno (v22-23). Ke ka hona A neng a lokile ho ba bang. Inahane u le sefate se behang ditholwana. Ha u dula haufi le Moya O Halalelang u Mo mamela (v25), u tla beha ditholwana tsa semelo sa Jesu. Ha wa tlameha ho leka ho loka, empa etsa sohle se matleng a hau ho ba haufi le Moya O Halalelang. O tla sebetsa ka ho wena ho tsosa ditakatso tse ncha tsa bohloeki le lerato, le lehloyo le lecha la dibe tseo, le ha di u tlisetsa thabo ya nakoana, di tlisetsang wena le ba bang bohloko bo tsoellang.

Ho bolellang ho tsamaiswa ke Moya (v25)? Ho bolela hore re mamela lentse la Hae ka boikokobetso le buang le rona ka Bible le ka matswalo a rona. Ha re le tekong, re tla utlwa tlhokomediso ya Hae e bonolo dipelong tsa rona. Re lokela ho Mo mamela. Ha re Mo mamela, re tla utlwa kgotso le thabo ya Hae. Ha re sa mamele, O utlwa bohloko (Baefese 4:30). Ha re etsa sebe, O tla re susumetsa ka lerato ka dipelong ho baka. Ha rea tlameha ho thatafatsa dipelo tsa rona ho Yena. Ha re tsamaiswa ke Moya haholwanyane, re tla Mo utlwa maphelong a rona ho fetisa, mme re tla hola ho fetisa moyeng hore re tshwane le Jesu.

Nka etsa eng?

Ke ha kae o ehlwang mosebetsi wa Moya O Halalelang kahare ho wena? Ke dife ho ditholwana tse robong tseo u di hlokang haholo? Di rapelle.

Na u batla ho bala ho ya pele?

Bala Baroma 8:28-29, 2 Bakorinthe 3:17-18 le 1 Timothea 4:12.

LETSATSI LA BO14: TSHEPO

Bafofisi ba difofane ha ba fofa marung a teteaneng ba welwa ke modikwadikwane ka nako e nngwe. Sena se bolela hore ba fellwa ke kutlwisiso ya hore na ba fofela hodimo kapa tlase. Ba bangata, ka mora ho latela kutlwisiso ya bona e sa tshepahaleng, ba wetse fatshe. Empa bakhanni ba difofane ba hlwahlwa ba tshepa disebediswa tse ba jwetsang ka nepo hore na ba fofa kae. Ka tsela e tshwanang, Bakreste ba bangata ba tela tumelo hobane maikutlo a kang pelaelo, ho ba molato, letswalo le matshwenyeho a ba aparela. Nakong e jwalo, re lokela ho se tshepe maikutlo a rona, re mpe re tshepe ho ditshepiso tsa Modimo tse sa fetoheng le ho botshepehi ba Hae mme re ithute ho fofela hodimo ka tsela e nepahetseng.

Bebele e ruta eng?

35 *Ka tsatsi lona leo, ha e le mantsiboya, [Jesu] A re ho bona: "A re tsheleng mose."*
36 *Ha ba kgutlisitse bongata, ba mo nka ka sekepana seo a neng a le ho sona; le dikepana tse ding di ne di le teng ho yena. 37 Jwale, ha tsoha sefelo se seholo sa moya; maqhubu a metsi a kena sekepaneng, mme se ne se se batla se tlala. 38 Yena o ne a le maraong, a robetse mosamong. Ba mo tsosa, ba re ho Yena: "Moruti, ana hase letho ho Wena leha re timela na?" 39 A tsoha, A kgalemela moya, A re ho lewatle: "Kgutsa, o re tu!" Yaba moya o a kgutsa, mme kgutso e kgolo ya eba teng. 40 Yaba O re ho bona: "Le boi keng hakalo? Le hloka keng tumelo?" 41 Mme ba tshaba ka tshabo e kgolo, ba bolellana, ba re: "Na Enwa ke mang na, ha A utluwa ke moya le ke lewatle?"* Mareka 4:35-41 (SSO61-SO)

Hona ho bolela eng ho nna?

Jesu U re beha leetong la tataiso (v35). Ebe ha re Mo mamela re Mo latela, hangata sefelo se ba teng mme dintho di senyehe (v37). Ha sena se etsahala hangata re utlwa eka Jesu ha etse letho ho re thusa, mme ha ho bonahale eka Wa re tsotella (v38). Empa Wa re tsotella! Ka ha O taolong, ha A tshohe. Ke ka hona A ka robalang. Ho se Mo tshepe ho etsa re be le letswalo (v40) mme re belaela hore na Wa re tsotella (v38). Empa A ka fedisa sefelo ka nako efe kapa efe. Hobaneng A dumella difefo ho tla maphelong a rona? O etsa sena ho hodisa tumelo ya rona ho Yena. Tumelo e so behweng tekong ha se tumelo ya nnete. Har'a sefelo se seng le se seng, hopola hore mohau wa Modimo o ka ebile o tla u matlafatsa.

Re hola tshepong jwang? Re ikhopotsa hore Jesu O na le rona. Wa re tsotella. Hape O entse ditshepiso tseo A tlo di boloka. O na le matla a ho fetola boemo bofe kapa bofe. Empa ho fihlela A etsa jwalo, re tlameha ho Mo tshepa. Ha re sa Mo tshepe, maikutlo a rona a tla re aparela mme a re swahlamanye. Ho molemo ho itshwarella ditshepising tseo Modimo a re tshepising tsona ka Lentsweng la Hae. Ditshepiso tse kang, 'Nke ke ka o tlohela, nke ke ka o lahla' (Baheberu 13:5).

Nka etsa eng?

Ke ditshepiso dife tse ka Bebeleng tse u amang ka ho fetisisa? Ke difefo dife tseo u kileng wa ba le tsona? U ile wa sebetsana le tsona jwang? U ka hodisa tshepo ya hao botshepehi ba Modimo jwang?

Na u batla ho ya pele?

Bala Baroma 4:18-21 le Baheberu 11:1-12 ho tseba haholwanyane ka tumelo.

LETSATSI LA BO15: HO FANA KA MATSOHO A MABEDI

Ha u khone ho bona dinaledi hantle ha u le haufi le mabone a khanyang. Ka tsela e tshwanang, u kheloha ha bobebe tisetsong ya hao ho Modimo le tumelong ya hao ho Yena ha u haptjwa ke tjehele le menyetla eo e e tlisang. Jwale u lora ka ho ba le tjehele e ngata ho fetisa, ka tshepo ya hore e tla tlisa dintho tse molemo bophelong, le tlhompheho ho tswa ho batho. Haeba sena ke sepheo se seholo bophelong ba hau, u bothateng bo boholo. U hloka ho hatella morao ho mabone a khanyang a tjehele le dintho, mme u bone khanya ya Modimo ka botjha.

Bebele e rutang eng?

5 le diphapang tsa lefeela tsa batho ba maikutlo a bodileng, ba lahlehetsweng ke nnete, ba lekanyang hore borapedi ke mogwa wa ho rua. Kgaohana le ba jwalo. 6 Efela borapedi, ha bo ena le ho kgolwa ha pelo, ke leruo le leholo. 7 Hobane ha re a ka ra tlisa letho lefatsheng, mme ho a bonahala hoba re sitwa ho ya le letho, ha re le tlohela. 8 Mme ha re ena le dijo le diaparo, a re kgolweng ke tsona. 9 Empa ba ratang ho rua, ba wela melekong, le lerabeng, le ditakatsong tse ngata, tse sa utlwahaleng, tse senyang, tse tebisetsang batho timelong le tahlehong. 10 Hobane lerato la leruo ke motso wa dibe tsohle; ba bang ka ho le lakatsa ba kgelohile tumelo, mme ba itlhabile ka mahlomola a mangata. 11 Haele wena he, monna wa Modimo, sesefa ntho tseo, mme o mathele ho loka, le borapedi, le tumelo, le lerato, le mamello, le mosa. 1 Timothea 6:5-11 (SSO61-SO)

Hona ho bolela eng ho nna?

Hobaneng ho le kotsi ho rata tjehele (le seo e ka u tlisetsang sona)? U ke ke wa ya lehodimong ka yona (v7). Ke mohlodi wa dibe tsohle (v10). Lerato la tjehele le tla baka hore re robe melao ya Modimo ka ditsela tse ngata, hobane re tla etsa eng kapa eng ho e fumana - esita le ho bua leshano, ho qhekella, ho utswa kapa ho sebedisa ba bang molemong wa rona. E ka etsa re kgelohe ho Modimo (v10). E re tshepisa thabo empa e tlisa mahlomola, tshenyeho le timelo ha nako e ya. Ha e na tiyo, ke ya nakoana hape e ka fela ha bobebe (v17).

Re ka sebedisa tjehele ka tsela efe e kgahlisang Modimo? Elellwa hore re ka kgotsofalla tse nyane (v8). Beha tshepo ya hao ho Modimo, eseng ho tjehele (v17). Thabela sohle seo Modimo a u fang sona, u se bone e le mpho ya u fang ka bongata (v17). Kopa Modimo seo u se hlokang. Fana ka matsoho a mabedi (v18) ho ba hlokang le ho kereke eo u leng karolo ya yona, u tswedisa pele pono eo Modimo a e fileng kereke. Shebana le letlotlo la kamoso le sa feleng le tlang ha u mamela Krete bophelong bona (v19). U ke ke wa ya le tjehele lehodimong, empa ha u e tsetela ho atisa mmuso wa Modimo, u ka romella tjehele ya hao moo u so fihle. Se ke wa lelekisa leruo. Empa, matha ka mora Modimo mme u sebedise tjehele eo a u tshepang ka yona ho Mo kgahlisa.

Nka etsa eng?

Na u beha tshepo ya hao ho maruo kapa ho Modimo? U ka sebedisa tjehele le leruo jwang ka mokhwa o molemo o isang thoriso ho Modimo?

Na u batla ho bala ho ya pele?

Bala Malakia 3:6-12, Matheu 6:19-34 le 2 Bakorinthe 9:6-12 ho tseba haholwanyane.

LETSATSI LA BO16: MOSEBETSI

Ted o ne a ena le mpho ya ho bapala bolo ya maoto empa o ne a sa bapale ka thahasello. Ntate wa hae o ne a sa ye lebaleng ho mo shebella. Ntate wa hae o ile a hlokahala. Ho makatsang ke hore Ted o ile a qalella ho bapala hantle haholo. Ha ho mohla a kileng a fetwa ke nako ya kwetliso. Ha mokwetlisi wa hae a mmotsa hore na ke eng e fetohileng Ted o ile a re, "Kaha jwale ntate wa ka o se a hlokahetse, ekanna yaba o ntjhebelletse ha ke bapala - ha ke batle ho mo swabisa." Ha re baleng ka moo Modimo, Ntate wa rona ya mahodimong, a re lebelang, le ka moo sena se lokelang ho re hlohlelletsa ho sebetsa ka thata.

Bebele e ruta eng?

17 Mme seo le se etsang, leha e ka ba eng le eng, ka ho bua, kapa ka ho sebetsa, le etse tsohle ka lebitso la Morena Jesu, le ntse le leboha ka yena Modimo Ntate.

Bakolose 3:17 (SSO61-SO)

22 Lona makgoba, mamelang beng ba lona ba lefatshe dinthong tsohle. Hona le se ke la ho etsa feela ha ba le teng, jwaloka ba ratang ho kgahlisa batho, le mpe le ho etsa ka botshepehi, ka ho tshaba Morena. 23 Sohle seo le se etsang, le se etse ka dipelo tsohle tsa lona, jwaloka hoja le se etsetsa Morena, e seng batho. 24 Tsebang hore Morena O tla le putsa ka ho le etsa majalefa a Hae. Morena eo le mo sebeletsang ke Krete. 25 Ha e le ya etsang ho sa lokang, o tla amohela moputso wa ho se loke, kaha Modimo ha a ye ka tshobotsi. 4:1 Lona beng ba makgoba, tshwarang makgoba a lona hantle, le ka toka. Tsebang hore le lona le na le Morena lehodimong.

Bakolose 3:22-25 & Bakolose 4:1 (SSO89SO)

Hona ho bolela eng ho nna?

Mehleng eo, makgoba a ne a atamela palo ya lefatshele tsejwang kalehare. Kahoo bohola ba Bakreste ba ne ba futsanehile. Ba ne ba phela ka mafoforetsane a tswang ho benghadi ba ruhileng. Ba ne ba sena tjantjello ya ho sebetsa. Ka ha ba ne ba hloka sepheo sa mosebetsi wa bona, ba ne ba utlwa ba sebediswa ke beng ba bona. Le kajeno, re ka utlwa eka mosebetsi le ditokelo tsa rona di utlwahala eka ke bokgoba. Empa re le Bakreste re ka ithuta ho kgahlisa Modimo ka mesebetsi ya rona. Re ka sebetsa ka mokhwa o kgahlisang Modimo jwang? Sohle seo u se etsang, u se etse ka thuso ya Modimo le tlotlisong ya Hae (v23). Modimo o batla ho u thusa ho ntlafatsa tsebo le bokhoni ba hao. U etsetse Modimo, e seng batho (v23). U se ke wa shebana le ho kgahlisa batho (jwaloka baokamedi, barupedi kapa matichere). Kgahlisa Modimo pele. Hona ho tla u susumetsa ho sebetsa ka thata ho sena motho, haese Modimo, ya u shebileng (v22). Sohle seo u se etsang, u se etse ka pelo yohle ya hao (v23). Tsela e lebisang ho katleho ke ho sebetsa ka thata. Leha ho le jwalo, ho sebetsa ho feta tekano le hona ha ho kgahlise Modimo (bala Dipesalema 127:1-2). Sebetsa ho fihlela sepheo se itseng (v24). Kopa Modimo ho u fa pono ya bophelo ba hao le ho sebetsa ka bohlale ho e fihlela. Sepheo se sehoho se tla hlohlelletsa sehlabelo se sehoho, se tla baka meputso e meholo. U se ke wa sebedisa matla a hao hodim'a ba bang hampe (4:1). Modimo o batla hore bohle ba be le menyetla e lekanang. Ke ka hona nakong e fetileng Bakreste ba ileng ba etella pele phediso ya bokgoba.

Nka etsa eng?

Na u ka re u motho ya sebetsang ka thata? U ka ba le tjantjello ya ho sebetsa ka thata jwang? U ka etsa bonnete ba hore ha u sebetse ho feta tekano jwang? Tse ding tsa ditiro tseo u dumelang hore Modimo o u file ho di pheella ke dife?

Na u batla ho bala ho ya pele?

Bala Maele 5:6-11

LETSATSI LA BO17: E TSA PHAPANO

Hobaneng u le lefatsheng lena?

Karabo: Ho bontshahatsa semelo sa Krete le ho etsa thato ya Modimo. Haeba Krete ke tshepo ya lefatshhe, batho ba Modimo ke barumuwa le mehlala ya tshepo eo. Ho latela Jesu ho bolela hore re thomong ya Modimo ho baka phethoho lefatsheng, re qala ka batho ba haufi le rona.

Bebele e ruta eng?

11 "Le lehlohonolo ha le hlapaolwa, le hloriswa, le etseletswa ka mekgwa yohle ka baka la ka. 12 Thabang, le nyakalle, hobane moputso wa lona o moholo mahodimong; etswe baporofeta ba bileng teng pele ho lona ba hlorisitswe jwalo." 13 "Le letswai la lefatshhe, empwa ha letswai le ka tapa, le ka tswaifatswa kang? Ha le sa na thuso, haese hore le lahlelwe kante, le hatakelwe ke batho. 14 "Le lesedi la lefatshhe. Motse o hahilweng hodima thaba o sitwa ho pateha; 15 lebone le lona ha le ke be le hotetswe le kwahelwe ka nkgo, empa le bewa sedulwaneng sa lona, le kgantshetse bohle ba ka tlung. 16 Lesedi la lona le ke le kganyetse batho jwalo, ba tle ba bone mesebetsi e metle ya lona, ba be ba tlotlise Ntata lona ya mahodimong." Matheu 5:11-16 (SSO89SO)

Hona ho bolela eng ho nna?

Re ka ba letswai jwang (v13)? Letswai le sebetsa ha feela le tswa ka har'a sephuthelwana sa lona ebe le kopana le dijo. Modimo O na le tshimo ya boromuwa bakeng sa hao - tshimo eo ke batho ba lelapeng la hao, ba motsaneng wa hao, sekolong sa hao kapa mosebetsing wa hao. Ha u leka ho ba moemedi wa Krete empa u se u lahlehetswe ke lerato la hau ho Yena le lerato la ditsela tsa Hae, ha u na ba le tshusumetso setjhabeng le ho batho ka bong. Bophelo le maikutlo a hao a kgopo a tla etsa lerata hoo ho seng motho ya tla utlwa mantswe a hao. Empa bophelo bo 'tswaifaditsweng' kapa bo nokuweng ka tjheseho ya Modimo le ditsela tsa Hae bo tla etsa hore ba bang ba nyorelwe Modimo.

Re ka ba lesedi jwang? Lesedi le hloka ho hlahiswa ho bohle, e seng le patwe. Ho latela Jesu ke taba ya pelo empa ha se taba ya lekunutu. Dumella lesedi la hao le kganyele batho (v16). Dikarabelo tsa batho e tla ba dife? Ba bang ba tla u hloya (v11-12). Empa ba mpa ba hloyile lesedi la Modimo ka ho wena le pepesang lefifi la bona. Ka hoo u se dumele hore sena se u ame.

Lebella meputso e tswang ho Modimo ka lebaka la ho mamella bohloko (v12). Leha ho le jwalo, ba bang ba tla bona mesebetsi e metle ya hao mme ba hulelwe ho Modimo ya u fang tjantjello (v16).

Nka etsa eng?

U utlwa u le jwang ho ba letswai le lesedi? U ka qala jwang ho bona batho ba bophelong ba hau e le tshimo ya hao ya boromuwa? Ke batho bafe bao u le kang ho ba fihlela bakeng sa Modimo? Ke mang eo u ka mo memang kerekeng?

Na u batla ho bala ho ya pele?

Bala Mareka 5:19-20.

KGATO YA KA E LATELANG KE EFE?

Na ho bile le motho ya o memetseng kerekeng? Lentswe le Molemo la Jesu le molemo hoo re ke seng ra ipolokela lona. Ke mang a bophelong ba hao eo u ka mo memang kerekeng ka Sontaha sena? Memo ya hao e ka nna ya ba monyetla oo ba o emetseng.

LETSATSI LA BO18: PHETA PALE YA HAO

Sheba ka hohle. Batho bao e seng Bakreste ba u pota-potile. U ka ba fihlela jwang? Tsela e nngwe ke ho ba motho wa sebele. Maneo a hlahang seyalemoya-ponong a bontshang bophelo ba nnete ke setumo sa sekwale-jwale se shebanang le maphelo a batho ka bonnete. Moloko wa rona ha u batle dipale tsa kgale kapa tsa maiketsetso. Ba batla nnete. Ke ka hona e nngwe ya ditsela tse matla ho fetisisa tsa ho susumelletsa batho haufi le Modimo ke ho ba phetela ka moo u fihletseng ho ba le dikamano le Modimo le seo A se entseng bophelong ba hao ho tloha ka nako eo. Metswalle e sa dumeleng ka ho fetisisa ba ka nna ba mamela haeba u etsa sena.

Bebele e ruta eng?

1 "Banna ba heso, le lona bo-ntate, mamelang boikarabello ba ka ho lona." 2 Ha ba utlwa hore o bua le bona ka Seheberu, ba kgutsa le ho feta pele, mme a re: 3 "Nna ke monna wa Mojuda ya tswaletsweng Tarasuse e Silesia, empa ke hodiseditswe motseng ona, ke le morutwana wa Gameleeele, ka rutwa ka nepisiso Molao wa bo-ntata rona, ka tjhesehella Modimo jwaloka lona bohle, kajeno. 4 Ka ikakgela ka setotswana ho hlorisa balatedi ba Tsela ena ya Morena, ka tlama banna le basadi, ka ba isa tjhankaneng. 5 Le Moprsta e Moholo le lekgotla lohle la baholo ba ka mpaka. Ba ile ba mpha mangolo a ngoletsweng Bajuda baheso ba Damaseka. Ka ya teng hore ke tlise ba Tsela ena Jerusalema ba tlamilwe, hore ba tle ba otlwe." 6 "Ha ke le tseleng, mme ke atametse Damaseka, e batla e eba hara mpa ya motsheare, hanghang ka teelwa hare ke lesedi le leholo le tswang lehodimong. 7 Ka wela fatshe, mme ka utlwa lentswe le re ho nna: 'Saule! Saule! O ntlhorisetsang na?' 8 "Ka araba, ka re: 'O mang, Morena?' Yaba o re ho nna: 'Ke nna Jesu wa Nasaretha, eo o mo hlorisang.' 9 Ba neng ba ena le nna ba ile ba bona lesedi, empa ha ba ya ka ba utlwisisa hore na ya buang le nna o reng. 10 "Ka re: 'Ke etse jwang Morena?' Morena a re ho nna: 'Tsoha, o kene Damaseka, mme teng o tla bolellwa tsohle tseo Modimo a rerileng hore o di etse.' 11 Kaha ke ne ke fougaditswe ke kganya ya lesedi leo, bao ke neng ke ena le bona ba ntataisa ka letsoho, mme ka ya fihla Damaseka. 12 "Jwale monna e mong ya bitswang Ananiase, ya hlomphang Modimo ho ya ka Molao, ya pakwang ke Bajuda bohle ba ahileng moo, 13 a tla ho nna, mme a ema pela ka, a re: 'Saule, ngwaneso, boela o bone!' Ka yona nako eo ka boela ka foufoloha, mme ka mmona. 14 "A re: 'Modimo wa bo-ntata rona o o kgethile hore o tsebe thato ya hae, o bone Ya Lokileng, mme o utlwe lentswe le tswang molomong wa hae, 15 hobane o tla ba paki ya hae ho batho bohle, o pake tseo o di boneng, le tseo o di utlwileng. 16 Jwale o diehelang? Ema, o kolobetswe, o hlatsuwe dibe tsa hao ka ho rapela lebitso la hae.' "

Diketso 22:1-16 (SSO89SO)

Hona ho bolela eng ho nna?

Paulosi o phetela batho ba bang e seng badumedi pale ya hae ya Modimo. Ha re ithuta ho eena, re tlameha ho re eng? Taba ya mantlha ke ho jwetsa batho hanyane ka moo bophelo ba hao bo neng bo le ka teng pele u ba Mokreste (v1-5). Ha u tloha moo, u hlalose diketsahalo tse u lebisitseng ho ba molatedi wa Jesu (v6-11). Qetellong, u ba bolelle ka moo bophelo ba hao bo fetohileng ho tloha ka nako eo (v12-16). Le ka mohla u se ke wa utlwa eka tsebo ya hao ya Modimo ha e matla haholo. Batho ba bang, jwaloka Paulosi, ba kopana le Modimo qalong ka mokhwa o matla, empa boholo ba batho ba qala dikamano le Modimo ka mokhwa o seng mohlolo. Pheta pale ya hao mme u tshepe hore batho ba bang ba tla hokahanywa ho yona. U e phete ka tsela e nolofetseng. Etsa hore tlhokomelo e tlohe ho bophelo ba hao e ye ho mohau wa Modimo. Haeba u bua ka mosebetsi wa Modimo ka ho wena, empa bophelo ba hao bo so qalelle ho fetoha, u se makale ha batho ba iphapanyetsa seo u se buang.

LETSATSI LA BO19: GO HO SEBELETSA

Ak'u nahane u le ka pele moleng o molele moo u fotseng, ha ka tshohanyetso mola o fetoha ebe batho ba ka morao ba sebeletswa pele. Ke sona seo Jesu a se etsang mmusong wa Hae. U etsa ba pele e be ba ho qetela, ba ho qetela e be ba pele. Lefatsheng lena, motho ya moholo ke yena ya sebeletswang ka ho fetisisa ke ba bang, empa mmusong wa Modimo motho ya moholo ke ya sebeletsang ba bang haholo (Mareka 10:42-45). Re ke ke ra bonahatsa Modimo lefatsheng lena jwaloka ha re lokela, ntle le hore re ithute ho ba le pelo ya bosebeletsi ho batho bao re kopanang le bona.

Bebele e ruta eng?

1 E ne e le pele ho mokete wa Paseka. Jesu o ne a tseba hore nako ya hae ya ho tloha lefatsheng lena, a eya ho Ntatae, e fihlile. O ne a ratile ba hae ba lefatsheng, mme a nna a ba rata ho isa qetellong. 2 Ha ho jewa dijo tsa mantsiboya, Diabolosi o ne a se a kentse pelong ya Judase, mora Simone Isekariota, maikutlo a hore a eke Jesu. 3 Jesu, ka ho tseba hore Ntatae o mo neile tsohle matsohong, le hore o tswa ho Modimo, mme o ya ho Modimo, 4 a tloha dijong, a hlobola seaparo, mme a nka [lesela], a itlamba ka [lona] thekeng. 5 A nto kga metsi, mme a qala ho hlatswa maoto a barutuwa le ho a hlakola ka [lesela leo] a neng a itlamme ka [lona]. 6 Ha a etla ho Simone Petrose, eo a re ho yena: "Morena, na ke wena o ka ntlhatswang maoto?" 7 Jesu a araba, a re ho yena: "Seo ke se etsang ha o se tsebe hajwale, empa o tla se utlwisisa hamorao." 8 Petrose a re ho yena: "Ha o ka ke wa ntlhatswa maoto le kgale!" Jesu a mo araba, a re: "Ha ke sa o hlatswe, ha o na kabelo ho nna." 9 Simone Petrose a re ho yena: "Morena, e se be maoto a ka feela, empa le wona matsoho le hlooho!" 10 Jesu a re ho yena: "Ya totseng o hlwekile kahohle, mme ha a sa hloka ho hlatsuwa haese maoto feela. Lona le hlwekile, empa e seng bohle." 11 O ne a tseba ya tla mo eka, mme ke ka baka leo a itseng: "Ha le a hlweka bohle." 12 Jwale ha a ba hlatswitse maoto, a apara seaparo sa hae, a boela a dula, a re ho bona: "Na le utlwisisa seo ke se entseng ho lona? 13 Le mpitsa 'Moruti' le 'Morena', mme le bolela hantle, hobane ke yena. 14 Jwale he, ha ke le hlatswitse maoto, nna ke le Morena le Moruti. le lona le tshwanetse ho hlatswana maoto. 15 Ke le beetse mohlala, hore le lona le tle le etse jwalokaha ke le entse. 16 Kannetenete, ke a le bolella, mohlanka ha a moholo ho monga hae, le moromuwa ha a moholo ho ya mo romileng. 17 Ha le tseba tsena, le lehlohonolo ha le ka di etsa.
Johanne 13:1-17 (SSO89SO)

Hona ho bolela eng ho nna?

Hobane re lokela ho sebeletsa ba bang? Ke lerato ka diketso (v1). Mmusong wa Modimo re phela molemong wa ba bang (v10). Jesu e bile mohlala mme O re laetse ho etsa jwalo (v15). Ha re sebeletsa ba bang, Modimo O tla re hlohonolofatsa (v17). Jesu O ile a re ho fana ke lehlohonolo le fetang ho fuwa (Diketso 20:35).

Hobaneng re lokela ho sebeletsa batho? Re lokela ho sebeletsa batho hobane re ba rata (v1). Re tlameha ho hopola hore na re bo-mang ka ho Modimo, le eo Modimo e leng yena ka ho rona (v3). Tsebo ena e re nolofaetsa hammoho le ho re etsa hore re ikutlwe re sireletsehile, e leng se tla re fa matla a ho ikokobetsa ka pela ba bang. Re lokela ho fumane mekhwa e khonehang ya ho sebeletsa ba bang (v5). Tshebeletso ha se tsela e lebisang boholong. Tshebeletso ke hona boholo.

Nka etsa eng?

Maikutlo a hao ke afe ka ho sebeletsa ba bang? Ke eng eo e u thibelang ho sebeletsa? Ke ka mekhwa efe eo u ka sebeletsang batho ba kahar'a kereke ya lehae ya hao, le eo u ka sebeletsang ditlhoko tsa phutheho ya kereke ka kakaretso?

LETSATSI LA BO20: KETSO YA MOSA E AMANG SECHABA

E nngwe ya diphoso tse bohloko ka kerekeng dilemong tsa ho qetela tse lekholo, ke thuto ya hore Testamente e Ncha e shebane haholo-holo le ho fihlisa batho lehodimong. Seo ha se nnete. Nahana ka polelo ya Jesu: 'Mmuso wa Modimo o hara lona.' Hape u nahane ka thapelo eo re reretsweng ho e rapela: 'ha ho tle Mmuso wa Hao.' Ho hlakile hore Jesu ha tla feela ho kenya batho lehodimong, empa ho kenya lehodimo ka ho batho. Pele, re qala ho natefelwa ka botlalo ba Modimo ha bo sebetsa maphelong a rona a robehileng. Ka mora moo, re ba dipitsa tsa botlalo ba Modimo maphelo a batho, haholo-holo batho ba maphelo a robehileng sechabeng sa rona.

Bebele e ruta eng?

25 Jwale ha ema Setsebi se seng sa Molao, mme ka ho leka Jesu, sa re: "Moruti, eka kgona ke etseng hore ke rue bophelo bo sa feleng?" 26 Yaba O re ho yena: "Ho ngotsweng Molaong? O o bala jwang?" 27 Yena a araba, a re: "O tla rata Morena Modimo wa hao ka pelo ya hao yohle, le ka moya wa hao wohle, le ka matla a hao wohle, le ka maikutlo a hao wohle, mme o rate le wa heno jwalokaha o ithata." 28 Jesu a re ho yena: "O arabile hantle. Etsa hoo, mme. o tla phela." 29 Empa yena ka ho rata ho itokafatsa, a re ho Jesu: "Wa heso ke mang?" 30 Jesu a araba, a re: "Motho e mong o ne a theohe Jerusalema a eya Jeriko, mme a wela hara dinokwane tse ileng tsa mo hlobodisa, tsa mo kgakgatha, tsa mo siya a le makgatheng a ho shwa. 31 Ha etsahala hore moprista e mong a theohe ka tsela eo, mme ha a mmona a mo kwekwetla. 32 Ka mokgwa ona oo le Molevi a fihla sebakeng seo, ha a mmona a mo kwekwetla. 33 Empa Mosamaria e mong, ya neng a eta, a fihla teng; ha a mmona a mo utlwela bohloko, 34 a atamela, a tlamella maqeba a hae, a a tshela ka ole le ka veine, a nto mo palamisa pelesa ya hae, a mo isa tlung ya baeti, mme a mo oka. 35 Ka la hosasane, a ntsha denare tse pedi, a di nea monga ntlo ya baeti, a re: 'Ako mo oke, mme seo o ka se sebedisang kathoko ho sena, ke tla o buseletsa sona ha ke kgutla.' 36 "Ho ba bararo bao, o re eo e bileng wa habo motho ya ileng a wela hara dinokwane ke mang na?"

37 A re: "Ke ya ileng a mo etsetsa mohau." Jesu a re ho yena: "Eya, o etse jwalo le wena!"
Luka 10:25-37 (SSO89SO)

Hona ho bolela eng ho nna?

Ho latela Jesu ho bolela hore re ithuta ho rata batho bao re phedisanang le bona (v27), haholo-holo batho ba bohlokong (v37). Paleng ena, barapedi (moprista le Molevi) ba ne ba sena nako kapa tsotello ya ho thusa, ha motho wa boemo bo tlase sechabeng (Mosamaria) a ile a etsa ka hohle kamoo a ka khonang ka pelo ya lerato. Modimo o batla re tsotelle ba hlokang, re etsa sohle se matleng a rona, mme re kgothaletsa ba bang ho kenya letsoho (v35). Ho ba Mokreste ha ho amane le ho rata Modimo feela. Ke taba ya ho rata batho.

Mofuta wa tumelo 'e hlwekileng, e se nang sekodi mahlong a Modimo Ntata rona, ke ena: Ho tihakela dikgutsana le bahlolohadi matshwenyehong a bona' (Jakobo 1:27 SSO89SO). O se le bale tlhokomediso ya Mme Theresa: 'Bafutsana ha ba re hloke jwalokaha rona re hloka bafutsana.' Ke hobane ho sebeletsa batho ba weleng moyeng ho re atametsa haufi le Modimo ya ba ratang.

Nka etsa eng?

U ikutlwa u le jwang ka ho ba le kutlwelo-bohloko e kholwanyane ho batho ba bohlokong? Ke eng eo tshwareletseng? U ka qalella ho thusa batho jwang ka tsela e bohlale? Na ho na le mafapha kapa ditshebeletso kerekeng ya hao tsa kutlwelo-bohloko tseo u ka bang karolo ya tsona?

Na u batla ho bala ho ya pele?

Bala Matheu 25:31-40 le 1 Johanne 3:11-18.

LETSATSI LA BO21: HO POBA KGOTSO

Motho o kile a teratela ha hae ka patsi ho arola ha hae le mohaisane eo a neng a sa mo rate. Yaba Modimo o mo jwetsa hore a pobe kgotso. Ka mahlo a meokho, o ile a heletsa lerako leo, mme a sebedisa patsi e tshwanang, a etsa tsela ho tloha monyako wa hae ho isa monyako wa mohaisane. Lefatshe la rona le bohlokong ka lebaka la marako a bora, kgethollo le ho iphahamisa. Modimo o re bitsa hore re fetole marako hore e be ditsela.

Bebele e rutang?

8 Empa kajeno lahang tsena tsohle: bohale, le kgalefo, le lonya. Bonyefodi le dipolelo tse hlabisang dihlong di se tswe melomong ya lona. 9 Le se ke la bolellana mashano, hobane le hlobotse botho ba lona ba kgale le mesebetsi ya bona. 10 Le apere botho bo botjha bo ntjhafatswang hore bo tshwane le Mmopi, le tle le be le tsebo ya nnete. 11 Kahoo ha ho sa le moditjhaba kapa Mojuda, ya bolotseng kapa ya sa bollang, ya hlaha, ya tala, lekgoba le molokolohi, empa ho na le Krete feela; ke yena tsohle, mme o ho bohle. 12 Kaha le le bakgethwa ba Modimo, ba haleditsweng, ba ratwang ke yena, ebang le kutlwelobohloko, mosa, le boikokobetso, le bonolo, le boiphapanyo. 13 Ha e mong a lla ka e mong le mamellane, mme le tshwarelane jwalokaha le Morena a le tshwaretse. 14 Hodima tsena tsohle, ebang le lerato, e leng lona le tlamahanyang tsohle hore di phethehe. 15 Kgotso ya Krete e ke e buse dipelo tsa lona. Ke ka kgotso ena Modimo a le bitseditseng ho ba mmele o le mong. Lebohang ke hona. Bakolose 3:8-15 (SSO89SO)

Hona ho bolela eng ho nna?

Hobaneng re tlameha ho hlola karohano le bora dipakeng tsa batho? Ha re latela Jesu ha re sa tsebiseha ka maemo, setso, morabe kapa bong, empa ka boitsebiso le boitshwaro bo bocha ba Modimo (v10) re le baratuwa le bakgethwa ba Modimo. Ho bolela hore Mokreste wa Nigeria o tshwana le Mokreste wa Amerika kapa wa China haholo ho feta ka moo a tshwanang le motswalle wa hae wa Nigeria e seng Mokreste. Re kopantswe ke kamano ya rona le Modimo e tshwanang. Ke ka lebaka leo morabe, setso, maemo, bong, boemo ba thuto le boiphihlelo ba leruo la rona di sa lekanang ho re arohanya. Krete ke yena tsohle mme O teng ho bohle (v11). Re ka batla kgotso jwang? Lokollwa bohale le lehloyong (v8). E-ba le qenehelo, mosa, boikokobetso, bonolo, mamello, tshwarelo le lerato (v12-13). Habohlokwa ka ho fetisisa, dumella lerato la Modimo ho re tlamahanya hammoho ka bonngwe le ka kgotso (v14-15). Phetoho e tlameha ho qala ka Kereke (v12). Haeba batho ba Modimo ha ba tsebe ho bopa kgotso, tshepo e tla be e lahlehile. E-ba motho ya bopang kgotso (Matheu 5:9). Moya O Halalelang O tla u tataisa mme O u matlafatse.

Nka etsa eng?

U kile wa bontsha kgethollo kapa bora ka mokhwa o jwang lelapeng la hao, sebakeng seo u dulang ho sona kapa mosebetsing wa hao? Ke diphetoho dife tse lokelang ho etsahala pelong ya hao? Na u hloka ho tshwarela kapa ho kopa tshwarelo ho motho? Ke khato dife tseo u ka di nkang ho ba motho ya bopang kgotso?

Na u batla ho ya pele?

Bala Baefese 2:14-22 ho tseba haholwanyane.

RE AHA KEREKE E AHANG SETJHABA

NA U NA LE DIPOTSO? INFO@HILLSONG.CO.ZA

**LENANEO LA PUO LA MARANGRANG:
HILLSONG CHURCH SOUTH AFRICA (iTunes + Spotify)**

**HO TSEBA HAHOLWANYANE:
[HILLSONG.COM/SOUTHAFRICA](https://www.hillsong.com/southafrica)**